



Splendet imaginibus , titulis tua splendet avitis,  
 Fulta sacris castis & pietate, Domus.  
 Sed quia nil prosunt magnorum facta parentum,  
 Ni terat has ipsas postera turba vias,  
 Malebas propriis virtutibus addere lumen,  
 Et meritis priscum continuare decus.  
 Et nisi jam primo fulsisse nobilis ortu  
     Protinus in cunis conspicuusque Tuis,  
 Nobilitatis honos partus tibi mente fuisse,  
     Et generi vivax integritate jubar,  
 Luxque tuae Domui , ferisque nepotibus omen  
     Moribus, ingenio , dexteritate , fide.  
 Atque utinam toto mos exulet ille pudendus  
     Orbe procul , stygio dignus obire vado,  
 Nobilis ut tantum cunis nascatur ab unis ,  
     Non fiat meritis nobilis ipse suis.  
 Non ita degeneri disperget indole famam  
     Maxima pars proavis penè superba suis.  
 Quae quia sic solo censetur nobilis ortu,  
     Et tantum ceris nominibusque Patrum,  
 Spreta jacet Virtus, genuina puerpera laudum ,  
     Spreta fides , spretus cognitionis amor ,  
 Ingenii decus , sanctique scientia Veri.  
     Pectoris & probitas & pietatis honor ,  
 Quicquid & ulterius clarum facit , auspice fama ,  
     Pollutis temptum moribus omne jacet.  
 Gloria quin etiam meritorum turpis habetur  
     Saepius , ingenuis & minus apta viris.  
 Nec pacis bellique calent laudabilis artes ,  
     Gloria nulla sago , gloria nulla togae.

\* k 2

O pudor!